



## Sumáriu Kazu

### Tribunál Distritál Dili

Janeiru 2014

#### Sumáriu prosesu julgamentu kazu iha Tribunál Distritál Dili- Períodu Janeiru 2014

##### Introdusaun

Depois feriadu anual tinan 2013 nian, iha semana terseiru no kuartu Janeiru 2014, Tribunál Distritál Dili kontinua hala'o fila fali servisu hanesan bain-bain hodi prosesu kazu sira ne'ebé tama ona agenda.

Iha fulan Janeiru 2014 JSMP konsege monitoriza kazu hamutuk 11 ne'ebé kompostu husi kazu krime 9, sivíl 2. Kazu krime hirak ne'e konstitui kazu omisídiu simples 1, omisídiu agravadu 2, krime kontra umanidade 1, danu agravadu 1, ofensa ba integridade fíísika simples ho natureza violénsia doméstika 3, furtu agravadu 1. Enkuantu kazu sivíl 2 ne'e mak hot-hotu kona-ba disputa rai.

Tuir mai deskrisaun sumariu julgamentu kazu kompletu :

##### 1. Kazu krime omisídiu simples - Nú.65/C.Ord/2011/TDD

Kompozisaun Tribunál: Koletivu

Juís : Dra. Ana Paula Fonseca, Dr. Jose Maria de Araujo no Dra.

Jaçinta Correia

Ministériu Públiku : Dr. Mateus Nessi

Defeza : Dr. Manuel Exposto

Konkluzaan : Sei kontinua prosesu

Iha 16 Janeiru 2014, Tribunál Distritál Dili julga arguidu ES ne'ebé diskunfia prátika krime omisídiu simples hasoru vítima Anastasio Silveiro (matebian). Kazu ne'e akontese iha 2011, iha Ponte Comoro Dili.

Prosesu rejulgamentu ne'e hala'o hodi rona alegasaun husi Ministériu Públiku no Defeza. Ministériu Públiku alega katak mantein akuzasaun iha prosesu julgamentu anterior ne'ebé akuza

arguidu ba krime omisídiu simples. Ministériu Públiku mantein nafatin ba omisídiu simples tanba testémuña xave la konsege marka prezensa iha tribunál.

Iha parte seluk, iha defeza ninia alegasaun finál, husu tribunál atu absolve arguidu tanba la iha provas. Aleinde ne'e tuir defeza katak durante julgamentu arguidu nega akuzasaun no deklarata katak arguidu hare Hipolito mak baku mate matebian ho besi kanu iha Ponte Komoro.

Antes ne'e iha tribunál nia oin arguidu deklarata katak autór prinsipál ba kazu ne'e mak Hipolito. Tuir arguidu Hipolito mak oho mate vítima iha Ponte Komoro. Iha momentu ne'ebá Hipolito husu ba arguidu hodi troka nia sai autór ba kazu ida ne'e ho promessa atu selu arguidu ho osan hamutuk \$ 4,000.00 ho razaun Hipolito oan sei ki'ik no sei iha universidade nune'é nia la bele tama prizaun. Iha ikus, Hipolito la kumpri nia promessa no nunka vízita arguidu iha prizaun.

Depois rona tiha alegasaun husi Ministériu Públiku no Defeza, tribunál marka fali julgamentu leitura sentensa iha 31 Janeiro 2014, tuku 17:00 lorokraik.

## **2. Kazu krime omisídiu agravadu - Nú.Proc.0068/2013/TDD**

Kompozisaun Tribunál	: Koletivu
Juís	: Dr. Julio Gantes, Dra. Jumiati Maria Freitas, Dra. Fransisca Marques Cabral
Ministériu Públiku	: Dr. Nelson de Carvalho
Defeza	: Dr. Rui Manuel Guterres
Konkluzau	: Sei kontinua prosesu

Iha 17 Janeiro 2014, Tribunál Distritál Dili hala'ó prosesu julgamentu ba arguidu hamutuk na'in 7 ho inisiál AdS, AS, FS, JdS, IdO, DM, no EdS ne'ebé alega komete krime omisídiu agravadu hasoru matebian Domingos, Hilda Carvalho, Saradou Carvalho no Raul. Kazu ne'e akontese iha loron 7 Feveireiru 2013, iha Samaleten Distritu Ermera.

Prosesu julgamentu ho agenda lee akuzasaun Ministériu Públiku no identifikasaun identidade arguidu sira.

Ministériu Públiku akuza katak, antes arguidu sira ba ataka vítima sira nia uma sira perpara ona material krime hanesan samurai, tudik, diman no katana. Material hirak ne'e uza hodi sona no tuda ne'ebé rezulta vítima Domingos, Hilda Carvalho, Raul no Saradau Carvalho lakon sira nia vida.

Kazu ne'e akontese tanba arguidu sira la satisfas ho vítima sira ne'ebé sempre dun arguidu sira no familia nu'udar naokten no buan.

Relasiona ho aktu hirak ne'e, Ministériu Públiku akuza arguidu sira kontra artigu 138 no 139 Kódigu Penál konaba omisídiu simples no omisídiu agravadu.

Depois de lee akuzasaun tribunál marka fali loron kontinuasaun prosesu julgamentu ba iha 11 Feveireiru 2014, tuku 14:00 lorokraik.

### **3. Kazu krime kontra humanidade- Nú.707/C.Ord/2012/TDD**

Kompozisaun Tribunál : Koletivu  
Juís : Dr. Julio Gantes, Dr. Pedro Reposo de Fiqueredo no Dra. Jumiati Maria Freitas  
Ministériu Públiku : Dr. Luís Landim  
Defeza : Dr. Manuel Expostu  
Konkluzau : Sei kontinua prosesu

Iha 20 Janeiru 2014, Tribunál Distritál Dili kontinua julga kazu krime grave ne'ebé akontese iha 4 Setembru 1999, iha Distritu Liquiça. Kazu ne'e involve arguidu ho inisiál LV nu'udár membru milisia Besi Merah Putih (BMP) ne'ebé diskonfia involve iha kazu krime kontra humanidade ne'ebé akontese iha Distritu Liquiça.

Iha akuzasaun Ministériu Públiku nian ne'ebé lee atraves husi tribunál, haktuir katak iha 4 Setembru 1999, arguidu hamutuk ho membru Milisia Besi Merah Putih (BMP) sira seluk ne'ebé hetan apoiu husi *Tentara Nasional Indonesia* (TNI) no *Polisi Indonesia* (POLRI) baku, tuku, tebe, no tiru mate vítima Jacarias Alves, Duarte do Santos, Augusto, Markus, Jaime Soares, Domingos no Leopoldo iha Distritu Liquiça.

Tuir loloos arguidu sira ne'ebé alegadu involve iha kazu ne'e hamutuk ema na'in 58, maibé tribunál julga deit arguidu LV tanba arguidu sira seluk too ohin loron seidak fila mai Timor Leste no sei hela iha Indonezia no arguidu sira balu mate ona. Relasiona ho kazu ne'e, Misnistériu Públiku no Defeza apresenta lista testamuña hamutuk ema na'in 132.

Depois lee tiha akuzasan tribunál marka julgamentu kontinua fali iha 10 Feveireiru 2014, iha tuku 09:00 dader ho agenda rona deklarasaun arguidu no depoimentu husi testemuña sira.

### **4. Kazu krime omisídiu agravadu - Nú. 596/ C.Ord/2013/TDD**

Kompozisaun Tribunál : Koletivu  
Juís : Dr. Julio Gantes, Dr. Hugo Pui, Dra. Jumiati Maria Freitas  
Ministériu Públiku : Dr. Nelson de Carvalho  
Defeza : Dr. Rui Manuel Guterres  
Konkluzau : Sei kontinua prosesu

Iha 21 Janeiru 2014, Tribunál Distritál Dili halao prosesu julgamentu ba arguidu nain rua ho inisiál DJdS no MDR. Arguidu na'in rua diskunfia oho mate vítima Ernesto (matebian), iha 7 Setembru 2013, iha Suco Katrailetan, Distritu Ermera.

Ministériu Públiku akuza katak iha 07 Setembru 2013 arguidu no vítima hasoru malu iha dalan klot ida wainhira fila husi toos. Iha momentu ne'ebá, arguidu no vítima provoka malu hodi kontinua tuku malu too arguidu monu ba rai. Wainhira hader arguidu kaer katana ne'ebé antes ne'e nia lori/kaer hela hodi taa kedas vítima iha matan, ulun noibun. Aktu ne'e rezulta vítima mate kedas iha fatin akontesimentu.

Ministériu Públiku akuza arguidu sira kontra artigu 138 no 139 Kodigu Penal pontu (b), (c) no (f) kona-ba omisídiu no omisídiu agravadu.

Iha audiénsia arguidu DJdS deklara katak akuzasaun Ministériu Públiku loos, maibé arguidu MDR rejeita akuzasaun Ministériu Públiku tanba iha tempu arguidu (DJdS) no vítima tuku malu nia (MDR) tauk no halai ba iha estasaun polísia hodi hato'o ba problema refere ba polísia no nia lahatene kona-ba vítima nia mate. Maske nune'é, Ministériu Públiku akuza hodi hatama arguidu MDR iha prizaun preventiva.

Iha alegasaun finál Ministériu Públiku husu tribunál atu kondena arguidu DJdS ho pena prizaun tinan 23 no husu tribunál atu fó desizaun ne'ebé justu ba arguidu MDR.

Enkuantu iha alegasaun finál defeza nian argumenta katak, Ministériu Públiku halo failansu boot ba akuzasaun ne'ebé halo hasoru arguidu MDR. Ministériu Públiku akuza no hatama arguidu iha prizaun preventiva too ohin loron, sei fó impaktu negativu ba futuru kuandu ema ruma hare ema baku malu ka oho malu, nia sei lakohi atu ba hato'o ba autoridade kompetente tanba tauk sai arguidu ba kazu.

Defeza mós argumenta katak arguidu MDR la'os hanesan testemuña ba kazu ne'e tanba iha tempu akontesimentu, MDR halai no fó hatene ba polísia relasiona ho problema tuku malu entre arguidu DJdS no vítima.

Bazeia ba faktu hirak ne'e, ba arguidu DJdS, defeza husu ba tribunál tetu didiak no hare sirkunstânsia atenuante sira hanesan arguidu foin primeira-ves komete krime no iha oan nain hat. Tanba ne'e, husu tribunál tetu no fó pena ne'ebé adekuadu. Iha parte seluk, ba arguidu MDR, defeza husu atu absolve arguidu husi alegasaun hot-hotu hasoru nia.

Hafoin rona tiha alegasaun husi parte sira, tribunal marka fali julgamentu ba leitura akordaun iha 07 Feveiriu 2014, tuku 14:00 lorokraik.

## **5. Kazu krime danu agravadu - Nú. 459/C.Ord/2013/TDD**

Kompozisaun Tribunál	: Koletivu
Juís	: Dr. Julio Gantes, Dr. Hugo Pui no Dra. Jumiati Maria Freitas
Ministériu Públiku	: Dr. Mateus Nessi
Defeza	: Dr. Rui Manuel Guterres
Konkluzau	: Sei kontinua prosesu

Iha 21 Janeiro 2014, Tribunál Distritál Dili hala'ó prosesu julgamentu ba kazu krime danu agravadu ne'ebé involve arguidu TdC hasoru vítima ATGdJ, iha 25 Dezembru 2012, tuku 02:00 dader-madrugada, iha Ponte Becora.

Tribunál hahu audiénsia julgamentu hodi lee akuzasaun husi Ministériu Públiku. Ministériu Públiku akuza katak iha 25 Dezembru 2012, maisumenus tuku 02:00 madrugada, vítima ho nia namorada fila husi misa kalan Natal. Wainhira to'ó iha Ponte Becora arguidu ho nia kolega nain tolu, tuda lisuk sira nia kareta hodi rezulta vidru oin no kotuk rahun. Hahalok arguidu hamosu prejuizu ba vítima hamutuk \$1,100.00.

Relasiona ho akontesimentu ne'e, Ministériu Públiku akuza arguidu kontra artigu 259 Kódigu Penal kona-ba danu agravadu.

Iha audiénsia julgamentu arguidu rezeita totál akuzasaun husi Ministériu Públiku no deklarata katak iha loron refere arguidu hamutuk ho nia familia sira hela iha uma no lasai ba fatin ruma.

Deklarasaun ne'e, kontrariu ho deklarasaun vítima ne'ebé deklarata katak iha tempu akontesimentu ne'e, vítima hare arguidu mak iha fatin akontesimentu hamutuk ho nia kolega nain tolu seluk.

Testemuña ho inisiál JP nu'udar vítima nia namorada depoimenta katak iha tempu akontesimentu nia lahare no la hatene semak tuda kareta tanba kalan no rai nakukun.

Iha alegasaun finál Ministériu Públiku haktuir katak arguidu iha direitu atu defende-an, maibe iha tempu akontesimentu vítima hare direita arguidu hamutuk ho nia kolega nain 3 seluk mak tuda vítima nia kareta hodi hamosu prejuizu ba vítima. Tanba ne'e husu ba tribunál atu fo pena ne'ebé refleta prejuízu ne'ebé vítima hetan husi akontesimentu ne'e.

Entertantu husi parte defeza husu ba tribunál atu absolve arguidu husi akuzasaun Ministériu Públiku tanba iha momentu ne'ebá arguidu lasai husi uma aleinde ne'e testemuña JP ne'ebé hamutuk ho vítima iha kareta laran lahare se mak tuda kareta tanba rai nakukun. Faktu sira ne'e naton atu hamosu duvida ba tribunál. Tanba ne'e husu tribunál atu absolve arguidu.

Tribunál marka fali julgamentu leitura sentença ba iha iha 07 Feveireiru 2014, tuku 14:00 lorokraik.

## **6. Krime ofensa ba integridade física simples - Nú.266/C.Ord/2013/TDD**

Kompozisaun Tribunál	: Koletivu
Juis	: Dr. Julio Gantes, Dr. Hugo Pui no Dra. Jumiati Maria Freitas
Ministériu Públiku	: Dr. Mateus Nessi
Defeza	: Dr. Rui Manuel Guterres
Konkluzaan	: Sei kontinua prosesu

Iha 23 Janeiro 2014, Tribunál Distritál Dili hala'ó prosesu julgamentu ba kazu ofensa ba integridade física simples no natureza violénsia doméstika hasoru nia feen ne'ebé involve arguidu ho iha 06 Juñu 2013, iha Caicoli, Dili.

Prosesu julgamentu hahu hodi lee akuzasaun husi Ministériu Públiku. Ministériu Públiku akuza katak iha 06 Juñu 2013, maisumenus tuku 09:00 vítima ba rakut malu ho EB iha arguidu nia fatin servisu iha Caicoli. Tanba ne'e arguidu aperta vítima nia kakorok no riba vítima ba rai no rezulta vítima nia ain tur kanek. Kazu ne'e akontese tanba vítima toman arguidu hamutuk ho fetu seluk ho inisial EB.

Iha prosesu julgamentu, arguidu rekoñese akuzasaun Ministériu Públiku katak akuzasaun loos. Arguidu deklara mós katak sira diak malu ona no durantene'e sira nunca iha problema.

Vítima deklara katak iha tempu akontesimentu arguidu aperta nia kakorok no riba ba rai maibe nia perdua arguidu no sira diak maluona nomós moris hanesan feen-laen.

Iha alegasaun finál Ministeriu Publiku husu ba tribunál hodi aplika pena multa tanbaarguidu nu'udar ema funsionáriu públiku. Iha parte seluk defeza husu ba tribunál aplika pena ne'ebé favorese ba arguidu tanba arguidu arrepende, konfesa no diakmalu ona.

Tribunal marka fali julgamentu ba leitura sentensa iha 30 Janeiro 2014, tuku 09:30 dader.

#### **7. Kazu disputa rai – Nú. 156/Civel/2012/TDD**

Kompozisaun Tribunál	: Koletivu
Juís	: Dr. Duarte Tilman, Dr. António do Carmo no Dr. José Maria
de Araujo	
Advogadu ba Autóra	: Dr. Pedro Aparico
Advogadu ba Reu	: Dr. Fernando de Carvalho Lopes
Konkluzau	: Adiadu

Iha 22 Janeiro 2014, Tribunál Distritál Dili halo adiamentu ba kazu sivíl ho tipu disputa rai ne'ebé lokalizadu iha Farol-Dili. Razaun adiamentu tanba reu no testemuña husi parte reu seidauk notifikadu. Kazu ne'e involve AdSF hanesan autór kontra LM hanesan reu.

Juís koletivu marka fali lora julgamentu ba iha 03 Marsu 2014, tuku 09:00 hodi fo tempu ba advogadu husi reu atu bele apresenta reu no testemuña iha prosesu ida ne'e.

#### **8. Kazu disputa rai – Nú. 155/Civel/2012/TDD**

Kompozisaun Tribunál	: Koletivu
Juís	: Dra. Jaçinta Correia, Dr. Duarte Tilman, Dr. José Maria

de Araujo

Reprezentante Legál parte Autóra : Dr. Pedro Aparico  
Reprezentante Legál parte Reu : Dr. Jaçinto Babo  
Konkluzau : Sei kontinua prosesu

Iha 22 Janeiru 2014, Tribunál Distritál Dili hala'o prosesu julgamentu ba kazu disputa rai ne'ebé involve autór ho inisiál AdA hasoru estadu hanesan reu. Rai disputa lokalizadu iha Farol-Dili. Testemuña husi parte autór hamutuk 3 no husi parte reu hamutuk 2.

Iha audiénsia julgamentu, testemuña DdS ne'ebé autór apresenta depoimentu katak antes okupasaun Indonezia, rai disputa mamuk nune'é governu Indonezia harii uma ba Xefi Prokuradoria Indonezia. Testemuña rasik lahatene rai refere partensia ba se.

Testemuña segundu no terseiru depoimentu katak rai disputa partensia ba autór. Iha rai nia laran autór halo baraka ida hodi rai material konstrusaun hanesan raihenek no fatuk. Rai ne'e, Governu Portuges mak oferese ba autór tanba iha altura autór hanesan funsionáriu públiku. Iha tinan 1974 tanba situasaun funu, autor halai tiha ba portugal.

Testemuña husi parte reu ho inisiál GT no OdS husi teras no propriedade depoimentus katak rai ne'ebé husik husi Governu Portuges no Governu Indonezia konsidera hanesan rai estadu Timor Leste. Lei fo tempu tinan ba parte sira atu halo reklamasaun ba propriedade ruma ne'ebé konsidera na'in maibé ba rai disputa ida ne'e liu tiha tempu ne'ebé lei dehan no laiha reklamasaun husi autór. Tanba ne'e, governu Timor Leste konsidera katak rai disputa partensia ba estadu.

Iha alegasaun finál kona-ba materia ba faktu, autór nia advogadu alega katak autór uza rai tuir direitu ne'ebé governu Portugal oferese. Direitu ne'e mós hakerek iha Buletin Oficial. Iha tinan 1974, autór halai ba Portugal tanba situasaun mak obriga laos voluntariamente. Iha tempu Indonezia, governu Indonezia uza puder hodi foti rai sein autorizasaun husi rai na'in. Governu Indonezia mós la halo alterasaun ba Buletin Oficial refere.

Iha parte seluk, advogadu reu ne'ebé representa estadu alega katak problema kona-ba rai barak mak laiha solusaun. Maibe relasiona ho rai disputa ida ne'e, konsidera rai estadu nian tanba iha momentu ne'ebá autór halo baraka ne'ebé la'os permanente.

Depois rona tiha alegasaun kona-ba matéria ba faktu, tribunál marka fali ba iha 28 Janeiru 2014, tuku 10:00 dader.

## **9. Kazu krime furtu agravadu - Nú.418/C.Ord/2011/TDD**

Kompozisaun Tribunál : Koletivu

Juis : Dra. Ana Paula Fonseca, Dr. Antonio Helder do Carmo no Dra.  
Jaçinta Correia  
Ministériu Públiku : Dr. Vicente de Brito  
Defeza : Dra. Laura Lay  
Konkluzau : Sei kontinua kontinua

Iha 24 Janeiro 2014, Tribunál Distritál Dili julga kazu krime furtu agravadu, ne'ebé involve arguidu AfdCG hasoru vítima KJ ne'ebé nu'udar patraun loja JAPE, iha 11 Abril 2011, iha Comoro, Distritu Dili.

Ministériu Públiku akuza katak iha 11Abril 2011, arguidu hapara no husu xave kamioneta vaskolante ne'ebé tula arguidu ninia sasan ba iha arguidu nia uma. Depois foti xave arguidu haruka kondutor ho inisial JN haruka fila ba iha Timor Plaza. Arguidu uza kareta kamioneta ne'e durante loron 40 nia laran iha hodi tula sasan no raihenek. Tanba aktu ne'e, hamosu prejuizu ba vítima ho valor \$ 4,000.00.

Ministériu Públiku akuza arguidu kontra artigu 252 Kódigu Penal kona-ba furtu agravadu.

Iha audiensia julgamentu arguidu konfesa katak akuzasaun Ministériu Publiku loos. Arguidu prende duni kamioneta refere maibe ho intensaun atu vítima kumpri promesa ba arguidu atu selu indemnizasaun hamutuk \$ 30,000.00. Vítima kumpri ona nia promesa nune'é arguidu fo fila ona kamioneta inklui osan \$ 4000,00.

Vítima deklara katak loos duni arguidu prende nia kareta durante loron 40 maibé sira rejolve ona problema ne'e.

Iha alegasaun finál Ministériu Públiku, husu ba tribunál atu aplika pena prizaun tinan 2 no suspende ba tinan 3 tanba arguidu provadukomete krime ne'ebé Ministériu Públiku akuza ba nia no arguidu entrega kareta wainhira hetan intervensaun husi PNTL.

Entretantu defeza husu ba tribunál atu tetu no fo pena ne'ebé justu ba arguidu tanba arguidu konfesa no arguidu entrega ona kareta ne'ebe nia prende.

Depois rona tiha alegasaun husi parte sira, tribunal, marka fali agenda leitura sentensa iha 26 Fevereiru 2014, tuku14:00 lorokraik.

## **10. Kazu krime ofensa ba integridade física simples – Nú. 442/C.Ord/2013/TDD**

Kompozisaun Tribunál : Singulár  
Juis : Dra. Jacinta Correia  
Ministériu Públiku : Dra. Ivonia Guterres  
Defeza : Dr. Marçal Mascarenhas  
Konkluzau : Sei kontinua prosesu



Iha 27 Janeiro 2014, Tribunál Distritál Dili hala'o prosesu julgamentu ba kazu ofensa ba integridade física simples ho natureza violénsia doméstika ne'ebé involve arguidu AdFS ofensa ba hasoru nia feen. Kazu ne'e akontese iha 26 Juñu 2013, iha Distritu Liquiça.

Ministériu Públiku akuza katak iha loron 26 Juñu 2013, arguidu tuku dala ida iha vítima nia liman kabun no dala ida iha vítima nia ulun. Kazu ne'e akontese tanba vítima hasé ka fo hanoin arguidu atu labele baku sira nia oan ninia ulun.

Relasiona ho aktu ne'e, Ministériu Públiku akuza arguidu kontra artigu 145 Kódigu Penal konjuga ho artigu 35 Lei Kontra Violénsai Doméstika.

Iha alegasaun finál, Ministériu Públiku husu ba tribunál hodi kondena arguidu ho pena tinan 1 suspende ba tinan 3. Entertantu defeza husuatu aplika pena ne'ebé justu ba arguidu.

Tribunál marka fali agenda julgamentu atu rona leitura sentensa iha 3 Fevereiro 2014, tuku 14:00 lorokraik.

### **11. Kazu krime ofensa ba integridade física simples – Nú. 128/C.Ord/2013/TDD**

Kompozisaun Tribunál	: Singulár
Juis	: Dr. Antonino Goncalves
Ministériu Públiku	: Dr. José Elu (estajiadu)
Defeza	: Dr. Rui Guterres
Konkluzau	: Sei kontinua prosesu

Iha 27 Janeiro 2014, Tribunál Distritál Dili hala'o prosesu julgamentu ba kazu ofensa ba integridade física simple ho natureza violénsia doméstika ne'ebé invove arguidu CH hasoru nia feen, iha 15 Fevereiro 2012, iha Distritu Liquiça.

Ministériu Públiku akuza katak iha loron 15 Fevereiro 2012, vítima túr iha kadeira ida no hemu hela kafe, hare arguidu lao mai, vítima husu no ba arguidu katak horikalan arguidu toba iha o nia doben nia uma. Rona liafuan ida ne'e arguidu nervouju hodi tuku dala rua iha vítima nia ulun, tebe kanotak dala rua, tuda kapasete ba vítima too vítima monu ba rai.

Iha tribunál, arguidu deklarata katak akuzasaun loos no vítima mós kontinua reforsa faktu sira ne'ebé akuza ba arguidu.

Depois rona tiha deklarsaun arguidu, tribunál adia fali julgamentu ba iha 11 Fevereiro 2014, tuku 16:00 pm ho agenda desizaun finál

Atu hetan informaun kompleitu bele kontaktu:

Luis de Oliveira Sampaio  
Diretór Ezekutivu JSMP  
Diresaune-mail: [luis@jsmp.minihub.org](mailto:luis@jsmp.minihub.org)  
[info@jsmp.minihub.org](mailto:info@jsmp.minihub.org)  
telefone: 3323883/77295795  
webiste: [www.jsmp.tl](http://www.jsmp.tl)  
facebook[www.facebook.com/timorleste.jsmp](http://www.facebook.com/timorleste.jsmp)  
twitter: @JSMPtl